



Publicaziuns dalla vischnaunca, jamna 45

Votaziuns communalas e votaziun federala

L'urna principala en casa communalada ei aviarta sco suonda:

Dumengia, ils 27-11-2016, 9.00–11.00

La documentaziun da votar duess mintga votant/a haver obteniu. Cass cuntrari san ins s'annunziar immediatamein, denton sil pli tard entochen venderdis, ils 25 da november 2016, allas 17.00 tier l'administraziun communalada (tel. 081 920 36 36).

Levgiament da votar

Mintga votant/a ha la pusseivladad da dar giu sia vusch a scret. En gliez mument sto el/la observar il suandont:

1. Emplenir ora ils cedels da votar a maun e metter quels en la cuviarta da votar grischa e serrar giu ella.
2. Metter la cuviarta da votar grischa ensemen cun il certificat dil dretg da votar suttascret en la cuviarta alva, cun la quala Vus haveis obteniu la documentaziun da votaziun.
3. La cuviarta ch'ei adressada all'administraziun communalada saveis Vus tarmetter cun posta (supplicau da francar) ni directamein fierer en la scaffa da brevs dalla casa communalada.

Ils cedels da votar ston esser sil pli tard la dumengia, ils 27 da november 2016 allas 11.00 tier l'administraziun communalada.

Aschinavon ch'ei vegn buca risguardau sura instrucziuns da votar, ein ils cedels da votar nun-valeivels.

Suprastonza communalada

Damonda da baghegiar

Nr. 2016 – 1061.000

Publicaziun dalla damonda da baghegiar ed introducziun dalla procedura d'expropriaziun tenor dretg cantunal (exposiziun publica)

Sebasond sin art. 45 dall'ordinaziun davart la planisaziun dil territori pil cantun Grischun (OPT) e digl art. 6 en cumbinaziun cun art. 2 dall'ordinaziun d'expropriaziun dil cantun Grischun (OExp) succeda l'exposiziun uffiziala da suandont project da baghegiar cul plan davart igl acquist da terren (cun la tabella pigl acquist da dretgs):

Patrun	Vischnaunca politica Disentis/Mustér
Project da construcziun	Correctura dalla Via Lucmagn/Via Gonda
Parcelas tangadas dalla construcziun	765, 773, 947 e 963
Parcelas tangadas dall'expropriaziun	765, 773, 947

Datum dall'exposiziun: Naven diils 11 da november 2016

Ils plans ed il plan pigl acquist da terren (incl. la tabella cugl acquist da dretgs) ein exponi publicamein en casa communalada Disentis/Mustér duront las uras da spurtegl. Encunter la damonda da baghegiar sa tenor art. 45 OPT vegnir inoltrau enteifer 20 dis naven dall'entschatta dall'exposiziun uffiziala protesta. Encunter la damonda per objects da construcziun sper vias cantunalas (damonda per lubientscha supplementara) sa tenor art. 54, al 2 OPT medemamein vegnir inoltrau enteifer 20 dis naven dall'entschatta dall'exposiziun uffiziala protesta. Proprietaris da terren san sefundond sin art. 6 en cumbinaziun cun art. 2 e 3 OExp inoltrau enteifer 30 dis naven dall'entschatta dalla exposiziun uffiziala resp. dalla comunicaziun persunala ina protesta encunteril project sco era encunter l'expropriaziun.



Las protestas ein d'inoltrar a scret alla vischnaunca Disentis Mustér, Casa communal, Via Cons 2, Caum postal 57, 7180 Disentis/Mustér.

Profilaziun/acts d'exposiziun:

- Profilaziun: marcaziun en la cuntrada
- Acts d'exposiziun:
- Plans e documentaziun tenor biro d'inschignier Mazzetta (project da baghegiar, plan pigl acquist da terren)
- Expertisa da traffic Hartmann

Disentis/Mustér, ils 8 da november 2016
Uffeci da baghegiar

Lubientschas da baghegiar

L'istanza da baghegiar ha concediu suandontas lubientschas da baghegiar:

Nr. 2016 – 1038.000

Guido Cathomen, Via Rezia 18, 7013 Domat/Ems; engrondaziun dalla casa da vacanzas, parcella 3082, Siut, 7186 Segnas.

Nr. 2016 – 1054.000

Nicolas e Christa Lindt, Ferchacherstrasse 14, 8636 Wald ZH; engrondaziun dalla casa, parcella 1113, Via Muot Selvaun 8, 7186 Segnas.

Disentis/Mustér, ils 8 da november 2016
Uffeci da baghegiar

Annunzia da baghegiar

All'istanza da baghegiar ei sin fundament digl art. 64, alinea 2 dalla lescha da baghegiar e digl art. 40 dall'ordinaziun davart la planisaziun dil territori dil cantun Grischun OPT vegniu annunziau suandont project:

Nr. 2016 – 2091.000

Elisabeth Küng e Claudio Levy, Burgmatt 11, 6340 Baar; sanaziun ed adattaziun dil mir schetg en curtgin, parcella 1319, Via Acletta 8, 7180 Disentis/Mustér.

Encunter quella decisiun san ins protestar a scret enteifer 20 dis dapi la publicaziun alla suprastonza communal.

Disentis/Mustér, ils 8 da november 2016
Uffeci da baghegiar

Vischnaunca Disentis/Mustér

**Plan d'areal Catrina
Communicaziun dil conclus d'approbaziun**

Ils 23 da matg 2016 ha la suprastonza communal approbau il plan d'areal Catrina. Il plan d'areal secumpona dils documents suandonts:

- Prescripziuns dil plan d'areal
- Plan da formaziun areal Catrina 1:500
- Plan d'avertura Catrina 1:500
- Plan cun tagl traversal Catrina 1:500



Tenor conclus nr. 939 ha la regenza grischuna approbau ils 25 d'october 2016 ils documents da planisaziun el senn dallas consideraziuns e cun in avis. Dils documents tiel plan d'areal e dil conclus dalla regenza sa vegnir priu envesta entochen ils **12 da december 2016**, en casa communal (stanza 10) durant las uras da spurtegl.

Disentis/Mustér, ils 8 da november 2016
Suprastonza communal

Cussegl da vischnaunca

Il cussegl da vischnaunca seraduna **gievgia, ils 17 da november 2016**, allas 19.30 **Center sursilvan d'agricultura a Salaplauna**.

Tractandas:

1. Regulativ d'indemnisaziun: Revisiun parziala (messadi nr. 51-2013/2016)
2. Lescha santeri: Revisiun parziala (messadi nr. 52-2013/2016)
3. Preventiv 2017 (messadi nr. 53-2013/2016)

Il president dil cussegl da vischnaunca

Suprastonza communal

Repartiziun dils departaments per la perioda d'uffeci 2017/2020

La suprastonza communal per la perioda d'uffeci 2017/2020 ei seconstituida e repartiu suandontamein ils departaments:

Robert Cajacob, president communal

Administraziun, finanzas ed economia

- administraziun/finanzas
- cudisch funsil
- survetsch polizial
- survigilonza giuridica
- turissem
- economia
- persunal

Clemens Berther, gerau

Forestalesser ed agricultura

- menaschi tecnic (lurvatori communal)
- forestalesser
- vias forestalas e funsilas
- agricultura
- megliaziuns
- Center da sport e cultura

Victor Flepp, gerau

Ambient e segirtad

- dismessa da rumians e cadavers
- deponias ed explotaziun da glera
- purificaziun dallas auas
- santeri
- militar
- polizia da fiug
- protecziun civila
- pumpiers



Jris Lombris, geraua

Sanadad, scolaziun, cultura e sport

- Center da sanadad Puntreis
- Spital regiunal Surselva
- tgira ambulonta
- ovras socialas
- Seniors-Ca
- scolas
- formaziun professiunala
- temps liber
- cultura
- sport

Iso Mazzetta, gerau

Baghegiar ed infrastruttura

- uffeci da baghegiar
- vias, illuminaziun publica
- punts e rempars
- traffic
- edificis communalis
- provediment e canalisaziun auas

Administraziun communal

Controla da habitonts

Naschientschas

Ladina Sac, naschida ils 30 d'october 2016, feglia dad Isabel e Roger Sac-Bearth

Maurus Tarcisi, naschius igl 1. da november 2016, fegl da Toja Maissen Berther e David Berther-Maissen

Tagliar caglias e plontas

Tenor art. 75, al. 4 dalla lescha da baghegiar astgan plontas buca disturbar la vischinonza ni la segirtad publica. Per liung dallas vias publicas e privatas sco era sendas ein tuttas caglias e plontas da tagliar anavos, aschia che nuot survarga il cunfin (era buca suenter ch'ei ha neviu). Quellas lavurs ston esser finidas sil pli tard entochen la **fin da november 2016**. En cass che las caglias e plontas vegnan buca tagliadas anavos enteifer il termin fixau, vegnan quellas lavurs exequidas entras il survetsch tecnic dalla vischnaunca cun adossar ils cuosts als proprietaris.

Uffeci da baghegiar Disentis/Mustér

Via Run – Serrada

Muort lavurs da reparatura vid la via d'uau Run vegn la via serrada naven dils **2 da november entochen ils 15 da november 2016** per tut traffic motorisau. Per tuttas sendas sco era per velos e pedunzs ei igl access da tut temps pusseivels.

Bien engraziament per l'enconuschientscha e capientscha.

Uffeci forestal



Fiera Sogn Martin

Gliendisdis, ils 14 da november 2016 ha liug sco mintg'onn l'usitada fiera da Sogn Martin. Ils stans vegnan endrizzai sin la Via Lucmagn ed eventualmein sin la Via da Scola e la Via Cons.

Las preparativas entras la vischnaunca entscheivan quei di allas 5.00 e la fiera ha liug naven dallas 8.00 entochen allas 18.00. Silsuenter settracta ei da far uorden, quei che cuoza entochen ca. allas 19.00.

Per evitar incaps, supplichein nus las fatschentas el contuorn dils stans da fiera da sche pusseivel buca schar vegnir quei di autos cun pli grondas furniziuns.

Nus engraziein grondamein per la capientscha
Uffeci da baghegiar

1916–2016 Chor-baselgia s. Gions Mustér

100 onns activs – Festivatad commemorativa Dumengia, ils 20 da november 2016

Program:

9.30 Messa festiva en baselgia s. Gions a Mustér

– Celebrant: Msgr. avat Vigeli Monn e concelebrants

– Predicatur festiv: Sur Marcus Flury, preses dalla Uniun ceciliana Surselva

– Il chor conta la «Messa giubilara» dad Alvin Muoth, cumponida aposta per il centenari dil chor-baselgia s. Gions Mustér tenor viarva da Sur Giusep Cathomas

Ca. 11.30: Commemoraziun en halla Cons

– Beinvegns entras Erwin Caminada, president dil Chor-baselgia s. Gions

– Gentar

– Allocuziuns

– Presentaziun dalla scartira festiva: «Chor-baselgia s. Gions – 100 onns activs»

– Produziuns: Societad da musica Mustér e Chor-baselgia Segnas

Parochianas e parochians ein envidai cordialmein suenter messa alla fiasta commemorativa en halla Cons. Il gentar vegn purschius gratuitamein dil chor centenar.

Nus sperein che numerus adherents da nies chor separticipeschien alla commemoraziun giubilara.

Cordialmein envidan

Erwin Caminada, president dil chor giubilar

Aldo Tuor, parsura dil comite d'organisaziun

Mats ei turnaus da sias vacanzas!

Praulas e historias cun Mats, la miur

Has ti plascher da vegnir en biblioteca e tedlar praulas e historias? Naturalmein astgas ti era prender cun tei tia mumma ni in'otra persuna. Mats, la miur e nus dalla biblioteca raquitein a ti ina praula ord in cudisch da nossa valischa da surpresas, e quei mintga secund venderdis dil meins dallas 14.30 tochen ca. allas 15.30.

Nus selegrein zun fetg sin tei.

Tgisà, forsà anflein nus mintgatun aunc enzatgei auter che mo cudischs en nossa valischa da surpresas?

Cun ils pli cars salids e sin seveser tochen gleiti.

Mats, la miur ed il team dalla biblioteca populara Disentis/Mustér e contuorn



Termins:

11 da november, 9 da december 2016,
13 da schaner, 10 da fevrer, 10 da mars, 7 d'avrel,
12 da matg e 9 da zercladur 2017

Biblioteca populara Disentis/Mustér e contuorn

Notg da raquents svizra 2016, venderdis, ils 11 da november 2016, 20.00 en la biblioteca populara Disentis/Mustér e contuorn.

25 onns agid ord l'aria: Igl anteriur miedi dalla Rega dr.

Hans Jacomet raquenta. Dr. H. Jacomet lavura dapi sia pensiun avon otg onns tier l'interpresa Mediacall AG, la quala tgira egl exteriur pazients che han giu in accident ni ch'ei vegni malsauns. Quella sera informescha el era tgei ch'igl ei d'observar tier ina dimora da vacanzas egl exteriur. Sanadad e segirtad pertuccan nus tuts.

Nus selegrein sin biars interessents.

Secziun da catschadurs Péz Alpetta

Sonda, ils 12 da november allas 17.00 ha liug la messa da s. Hubertus en baselgia s. Gions. Suentar messa ei in e scadin cordialmein envidaus ad in apero en halla Cons. Naven dallas 19.15 ha liug per ils commembers dalla secziun da catschadurs Péz Alpetta la sera famigliara el Center sursilvan d'agricultura.

Cordialmein envida

la suprastonza

Tri tra trallala!

Bugen envidein nus tut ils affons cun accumpignament ad in teater da casperet. Il toc senumna «La flura misteriusa» e ha liug **mesjamna, ils 16 da november 2016** allas 14.30 el Center d'agricultura Surselva a Salaplauna. Silsuentar dat ei ina pintga sorpresa pils affons e stiva da caffè. Nus selegrein sin vossa viseta, cars pignets e carschi.

Cordialmein envidan

mummas cun affons pigns

Gruppa da puras Disentis/Mustér

Radunonza generala, gievgia, ils 17-11-2016 allas 20.00 en l'ustria «Crestas» a Segnas.

Cordialmein envida

la suprastonza

Cuors da far tschupials d'advent

Nus decorein tschupials d'advent, mardis, ils 22 da november, allas 20.00. Ils tschupials vegnan formai sin in plumatsch da mescal. Il cuors che cuoza duas uras vegn menaus atras da florista e pura Cornelia Berther- Oberholzer el Center sursilvan d'agricultura, Salaplauna Disentis/Mustér. Annunzias entochen ils 19 da november tier Cornelia Berther, tel. 081 949 13 74 ni 077 491 22 85, e-mail: baseli.berther@kns.ch